

菩薩行方便境界神通變化經卷上 養八

劉宋天竺三藏求那跋陀羅譯

如是我聞一時佛在優禪延國住旃荼鉢樹
提王園其中多有諸娑羅樹多羅樹迦尼迦
羅樹尼拘羅樹博叉樹優曇鉢羅樹復有娑
師華陀貳迦華阿提目多華瞻婆華阿叔迦
樹波吒羅樹以爲莊嚴又有泉井池沼江河
清流莊嚴又有青黃赤白蓮華徧諸水上鵝
鴈鴛鴦拘那羅鳥鉢吒軍陀鸚鵡鵲鵠命命
諸鳥出種種音多諸黑蜂出妙音聲多柔軟

草徧布大林與大比丘衆十二億俱大德舍
利弗大目犍連摩訶迦葉阿尼律陀須菩提
大迦旃延摩訶劫賓那離波多波賓那難提
翅那那提迦葉伽耶迦葉富樓那彌多羅尼
子憍梵波提般陀翅那周利槃特闍婆摩羅
子呿陀婆林難陀摩訶拘絺羅羅睺羅大德
阿難等而爲上首十二億俱一切入一法界
處行進入一切諸法如性行虛空行無依止
處無依止行離諸一切所起覆蓋障礙結纏
入度如來無有法界近一法界向一切智道

而不休廢欲一切智心無退轉智慧了別得
到彼岸勤進修行方便境界摩訶波闍波提
耶輸陀羅等與八億比丘尼俱一切成就白
淨之法皆悉善行一切智道近一切智善行
進入無有法性觀一切法無有性相自解諸
法實際無際得於無礙解脫智慧隨應衆生
所應調伏善能示現復與七十二億大菩薩
衆其名曰大力菩薩大力持菩薩大變化菩
薩大變化王菩薩大進趣菩薩大進健菩薩
大吼菩薩大吼意菩薩大衆主菩薩大香象

菩薩大月菩薩善月菩薩功德月菩薩寶月
菩薩普照月菩薩法無垢月菩薩月照菩薩
妙名月菩薩放光月菩薩滿月菩薩梵音菩
薩梵王雷音菩薩地音菩薩法界音聲菩薩
降一切魔場音菩薩妙音聲菩薩普音音菩
薩無妄想分別音菩薩地輪音菩薩一切無
障音菩薩普藏菩薩無垢普藏菩薩德藏菩
薩照藏菩薩寶藏菩薩月藏菩薩日藏菩薩
熾藏菩薩蓮華藏菩薩蓮華德藏菩薩大意
菩薩益意菩薩妙意菩薩好意菩薩勝意菩

薩增意菩薩無邊意菩薩廣意覺意菩薩無
盡意菩薩須彌燈菩薩大燈菩薩法炬燈菩
薩照一切方燈菩薩普燈菩薩滅一切暗燈
菩薩照一切道燈菩薩一照明燈菩薩月燈
菩薩日燈菩薩離一切惡道菩薩魔不降伏
菩薩大魔不降伏菩薩威德菩薩無降伏菩
薩無能測菩薩威德覺乾惡菩薩得大勢菩
薩觀世音菩薩彌勒菩薩文殊師利童子菩
薩摩訶薩等七十二億俱皆是一生得陀羅
尼得諸三昧得無邊樂說得無礙無所畏獲

得神通到於彼岸能過無邊佛之刹土遊於
神通身心解脫諸礙無疑智見成就無佛世
界現佛出世善轉法輪無有錯謬隨於一切
衆生所解而爲說法說無作法於法性中無
有動發非不動發其心入度到於彼岸演說
空法吼大師子吼降伏破壞一切外道伏魔
怨敵得諸菩薩所行神通斷離愛瞋其心平
等如地水火風入於一切如來密處爲一切
衆生而作佛事常爲諸佛之所讚歎受持一
切未來世劫受持一切如來法性雨於法寶

卷八

三

歎其所有一切功德不可窮盡爲世界主本
願成就行於如來解脫之行先已善修行於
大乘信眼清淨無有垢汙常恒勤進供養給
事諸佛如來能善莊嚴不退莊嚴趣向大悲
其心解性無可比喻超度疑佛猶豫惑心爲
過諸佛之所護持復有無量優婆塞優婆斯
於此三千大千世界威德無喻諸天天主諸
龍龍主夜叉夜叉主乾闥婆乾闥婆主阿修
羅阿修羅主迦樓羅迦樓羅主摩睺羅摩睺
羅主緊那羅緊那羅主人非人人非人主一

切各與百千眷屬皆來會坐爾時世尊無量
百千大眾圍繞坐於德藏師子之座蔽諸大
衆身光猛盛照明無垢猶如須彌顯于大海
映蔽諸山照明挺特世尊亦爾坐師子座覆
蔽一切諸天世人殊特猛盛照明無垢猶十
五日月盛滿已隱蔽衆星照明清淨世尊亦
爾隱蔽一切諸天世人照明清淨猶如虛空
清明淨潔無有雲翳日放明網隱蔽山光螢
火暗已極照明清淨世尊亦爾坐師子座降伏
隱蔽諸天世人極爲照明亦復隱蔽釋梵護

世等光猶如暗夜於高山頂熾然大火照明
清淨世尊亦爾處師子座降伏隱蔽諸天世
人光極照明清淨無垢如師子獸王降伏一
切諸小禽獸世尊亦爾處師子座降伏隱蔽
一切天人如毘瑠璃如意寶珠八楞無垢放

卷八

淨光明世尊亦爾處師子座端嚴殊妙照明
十方如轉輪王降伏四域所有衆生世尊亦
爾處師子座降伏隱蔽諸天世人如釋提桓
因著釋迦毘楞伽寶瓔珞已處善法堂降伏
隱蔽諸天光明世尊亦爾處師子座降伏隱

蔽諸天世人照明清淨爾時文殊師利童子
知大衆心已見如來身威德隆盛作是思惟
是何光瑞世尊今坐於師子座極爲光明清
淨殊特大衆甚多我今當問如來是義爾時
文殊師利童子即從座起正於衣服偏袒右
肩右膝著地合掌向佛以偈讚曰

十方照光明 降伏天世人 三有無與等
衆生無有過 如須彌山居 悉照明諸方
降伏蔽諸山 勇出照衆山 佛持德亦爾
智山勇出世 降伏蔽諸衆 常恒淨照明

如月處虛空	日月功德照	盛滿極圓足
降伏蔽諸宿	十力亦如是	弟子星圍遶
放淨月光明	能照人天世	喻如日宮殿
照明降一切	人尊主如是	降伏人天世
猶如山頂火	暗夜照諸方	智光明如是
調御放妙光	如師子獸王	顯威德降獸
外道衆如是	顯照明降伏	人主轉輪王
威德降伏世	世調御如是	降伏照明世
三十三天王	降伏勝諸天	無等亦如是
降伏照諸衆		

爾時文殊師利童子偈讚佛已合掌白佛言
惟願世尊今爲此衆說菩薩行方便境界神
通變化經若衆生聞趣上行者當發阿耨多
羅三藐三菩提心向下行者得上勝進已發
無上菩提心者增益無上菩提境界懈怠衆
生發大欲樂退道衆生安菩提道趣菩提道
諸衆生等具足莊嚴如來智度文殊師利如
是說已佛告文殊師利如來應供正徧知所
說難解當何緣說何緣進入難知難覺難可
測量難教難度諸天世人壞威儀者及破戒

者不能解知下衆生等所不能解諸壞心者
所不能信爲惡知識之所攝者所不能入離
善知識者所不能知不爲諸佛所護持者不
能聽受況當解趣無有是處惟除諸佛所護
持者爾時世尊而說偈言

文殊聽我說 汝所問事義 下暗不能行
不知此法性 於先佛不行 調御世不護
若聞此法者 無有恭敬心 惡知識所攝
離善知識人 若聞如是法 疾退墮大山
小心無進行 無有勝妙心 下人無信解

是等聞不喜 佛悲彼不說 勿矯彼衆生
不信此法故 長夜無利益

爾時文殊師利童子白佛言世尊此所集衆
皆悉清淨先久善行多供給事過去諸佛善
知識攝善淨信根恭敬出世解脫之法善知
淨心畢竟善解善教如此等衆皆悉集會能
知能解如此之法善哉世尊願今演說攝取
利益諸衆生故重說偈言

此多衆生求法利 善知解了此法性
過去諸佛所修行 是故說法調御師

悉皆恭敬合掌住 瞻視諦觀世調御
調御爲此生悲心 大覺願說勝妙法
我今咸請於法王 願當演說勝妙法
爲利攝取菩薩故 人尊願開善法藏
文殊師利如是請已佛即讚言善哉善哉文
殊師利汝問如來應供正徧知如是之義文
殊師利汝今悉知一切法行於諸法中無有
疑惑汝已善覺智慧方便文殊師利汝多利
益諸衆生行文殊師利汝爲未來諸菩薩等
作大光明文殊師利汝今諦聽善思念之吾

今當說菩薩所行方便境界神通變化經文
殊師利諸菩薩言如是世尊當至心聽佛言
善男子若有成就十二功德法是善男子善
女人等能發阿耨多羅三藐三菩提心何等
十二有妙解性離下解行有性行悲生於白
淨有心專行堅受無僞有善莊嚴久修善行
有善恭敬供養諸佛善集白淨法有身業口
業意業無作離一切惡有遠惡知識近善知
識有如說如作無有諂誑有善學知法不貪
於味節量而食有如來護持離魔所持有常

一切諸衆生中生於悲心亦不放捨一切衆生心亦不貪有因緣力功德莊嚴善男子是名成就十二功德法善男子善女人發於阿耨多羅三藐三菩提心是利益心能與一切衆生樂故哀愍心不作諸惡故大悲心堪任荷負諸衆生故大慈心消滅一切諸惡道故白淨心不求餘乘故無愛心離於一切結使濁故是淨心其性淨故如幻心無有物故無所有心離所有故堅固心不動搖故不退轉心達諸法故度於一切衆生之心如說作故

爾時世尊而說偈言、

若有佛子善修行、清淨之法滿足心
一切衆生慈悲心、柔軟之心爲菩提
本先遠離惡知識、近示菩提善知識
誓願勤進菩提果、生於覺知菩提心
恒常不生疲厭心、所修行行如卒際
猶如金剛不退心、如是等生菩提心
於諸衆生慈悲心、安諸衆生住樂故
遠離一切諸惡故、是等疾生菩提心
慧者不求於餘乘、思惟菩提勝功德

淨心無垢亦無愛 如是等欲菩提心
離物非物無有愛 其性猶如電幻等
離一切物無有相 佛說菩提心等是
離一切使一切惡 無垢明了如虛空
一切文字不可見 此說菩提心清淨
是菩提根勝妙行 亦陀羅尼諸辯者
亦是諸根及衆好 此是得佛諸功德
佛告文殊師利菩薩安住見於如是十二功
德勤進修行檀波羅蜜何等十二見菩提道
安和調適勤進修行檀波羅蜜見大富祿勤

進修行檀波羅蜜見生可愛種性中故勤進
修行檀波羅蜜見離慳垢勤進修行檀波羅
蜜見施心具足勤進修行檀波羅蜜見關閉
於餓鬼門故勤進修行檀波羅蜜見財多共
欲求堅固勤進修行檀波羅蜜見諸所須自
在具足勤進修行檀波羅蜜見修習行一切
捨已勤進修行檀波羅蜜見離貪惜捨一切
物勤進修行檀波羅蜜見我當滿檀波羅蜜
故勤進修行檀波羅蜜見應順行如來教勅
故勤進修行檀波羅蜜所有布施悉皆迴向

阿耨多羅三藐三菩提善男子是名菩薩見
於如是十二功德勤進修行檀波羅蜜爾時
世尊以偈頌曰

施求無等一切智 手足淨目頭骨髓
不惜內外一切捨 後無貪惜增益德

卷八

九

當成妙封生勝家 我增菩提降貪垢
得自在滿於檀度 一切諸佛所讚施
慧見是諸功德利 我當修行一切捨
復次諸善男子若菩薩見如是十二功德事
故勤進修行尸波羅蜜何等十二見我當護

持攝成就戒勤進修行尸波羅蜜見我當向
菩薩道故勤進修行尸波羅蜜見我當解結
使縛故勤進修行尸波羅蜜見我當離一切
惡道勤進修行尸波羅蜜見我當淨一切惡
道勤進修行尸波羅蜜見我當成於身口意
無作業故勤進修行尸波羅蜜見我當爲慧
者不訶勤進修行尸波羅蜜見我當習不放
逸界勤進修行尸波羅蜜見我當施一切衆
生無所畏故勤進修行尸波羅蜜見我當得
身口意戒勤進修行尸波羅蜜見我當於一

切法中得自在故勤進修行尸波羅蜜見我
當學無上如來戒勤進修行尸波羅蜜善男
子是名菩薩見於十二功德事故勤進修行
尸波羅蜜是戒迴向於一切智爾時世尊以
偈頌曰

我當得解結使縛	我當關於惡道門
我當思量勝妙事	我當護戒牛愛尾
我當如佛所教住	我當慧者所稱讚
我當護持常不離	我當有住戒功德
我當身口得無作	我當行意無作法

我當善護身口意	我當不復行惡道
若不放逸善逝讚	是諸一切善業本
我當常住於是處	捨離一切諸放逸
我當行尸波羅蜜	我當成就於佛法
我當淨於如來戒	是一切戒勝無上
不希望求此功德	若菩提薩 ^十 求勝道
護戒猶如犛牛尾	當得一切功德利
復次諸善男子菩薩念於是十二行修行於	
忍何等十二一切行空修行於忍不得我故	
修行於忍不得衆生修行於忍不偏自他修	

行於忍究竟無瞋修行於忍覆蔽結使修行
於忍永斷貪瞋修行於忍成就相好修行於
忍欲生梵世修行於忍離他逼切修行於忍
欲得盡智無生智故修行於忍欲降諸魔修
行於忍欲知見如來無邊身故修行於忍以
是忍辱悉用迴向於一切智善男子是名菩
薩見十二行修行於忍爾時世尊以偈頌曰
此法空無有 求不得衆生 解知於此法
安住忍功德 俱遠離二邊 自他無有瞋
慧者修忍力 大悲如是示 究竟無有瞋

進修忍無憂 覺知於盡故 修忍寂結使
相好色嚴淨 是生於梵宮 堅進近忍力
樂思惟吉忍 無力忍力等 今魔力非力
一切德未歸 是故修妙忍
復次諸善男子菩薩有於十二莊嚴莊嚴修
進何等十二莊嚴覺了一切佛法勤修行進
莊嚴往詣一切佛所勤修行進莊嚴供給一
切如來勤修行進莊嚴教化一切衆生勤修
行進莊嚴安住一切衆生於佛法中勤修行
進莊嚴滅諸衆生無明勤修行進莊嚴施諸

衆生佛智勤修行進莊嚴淨於一切佛土勤
修行進莊嚴盡於未來際劫修菩薩行而不
疲厭勤修行進莊嚴欲於一彈指頃徧至一
切佛之世界勤修行進莊嚴一切佛之世界
成無上道轉妙法輪勤修行進諸善男子是
名菩薩十二莊嚴勤修行進爾時世尊以偈
頌曰

無上勇進無懈怠 是佛子向勝菩提
徃多佛刹猶復斷 是所行處無疲厭
爲化衆生堅精進 堪百千億劫苦聚

常恒勤進無懈怠 施與衆生滅度樂
我願修淨諸佛刹 盡悉覺知一切法
我諸世界中勝輪 轉已多億衆生調
一念心覺勝菩提 遣化多刹調伏故
佛子常度進彼岸 現衆莊嚴爲衆生

復次諸善男子菩薩十二行修於禪定何等
十二煇結使行究竟不發故正心住行不隨
境界故無依止行離欲界色界無色界故出
過世行降伏非聖凡夫定故增益勝行無我
心故次第定行分別禪故無所有行離有想

故無邊之行訶責有邊三昧禪故以是定行
 善寂靜故調心行無不知故寂靜之行護諸
 根故方便境界行菩薩修禪不捨不廢非慧
 非慢非見非愛非念修故是故菩薩降伏一
 切諸修禪者諸善男子是名菩薩見十二行
 修於禪定爾時世尊以偈頌曰
 此禪定尊貴 是彼菩薩行 燋一切結使
 究竟不復發 專修寂定禪 不修逐境界
 若有不住心 勸令住於定 修無依止禪
 彼無所依止 欲色無色界 思惟無所著

是禪超出世 是菩薩所知 是故降一切
 諸非聖定者 行於次第禪 欲得自在故
 是故捨禪定 還生於欲界 增益勝妙行
 智慧者修禪 是無我心禪 爲於菩薩說
 無量無邊行 修行最上禪 是故少分禪
 照明令降伏 智慧方便俱 修禪大名稱
 都無所見得 一向白淨行 無所依止故
 亦不住於物 智慧者修禪 捨離於物相
 行如是等行 智慧者修禪 於緣覺自在
 是故無所行

諸善男子菩薩十二行智入般若波羅蜜何
等十二明了行不暗蔽故大炬行照明一切
諸結使故放智明網行離無智故智慧鉤行
拔無明根故善利犁行破愛網故金剛行破
結山故日宮行乾焦結泥故火大行燒生樹
故摩尼寶行不迷惑故是空行無有物故無
相行無有相故無願行過三界故善男子是
名菩薩十二行智入般若波羅蜜爾時世尊
以偈頌曰
此慧勝世間 作光滅諸暗 日炬甚清淨

照諸結使衆	慧犁滅無明	覺知破壞愛
破諸結使山	天主金剛杵	破壞阿脩羅
所有諸軍衆	得照明離暗	慧示現如燈
猶日乾焦泥	勝慧猶如日	度結海彼岸
猶如船度水	拔斷無智樹	如刀斬諸樹
得不迷摩尼	空無物性相	常離於覺觀
不依諸有道	能破壞疑惑	能論出言說
示生死過患	示現涅槃炬	此慧調世眼
現無迷相事	因慧菩薩健	離暗行菩提
諸善男子是菩薩知見十二境界示現方便		

何等十二善男子是菩薩到涅槃境界方便
示現生死境界到寂靜境界方便示現在衆
闍中到禪境界方便示現后宮嫔女到無作
境界方便示現諸作境界到無生境界方便
示現生死境界離四魔境界方便示現降伏
諸魔到聖人境界方便示現近非聖境界離
世境界方便示現世間境界得智境界方便
示現凡夫境界現了見於實際境界方便示
現不墮聲聞緣覺境界達解得到無相法界
方便示現相好嚴身爲化衆生之境界故入

佛境界方便示現諸魔境界諸善男子是名
菩薩知見十二境界方便示現爾時世尊以
偈頌曰

是方便境界	菩薩淨衆生	是住於境界
示一切境界	得涅槃境界	方便現有爲
又到是境界	無二過患汙	得到寂靜處
方便現衆闍	於二俱無著	無著行如蜂
示現嫔女中	宮中食娛樂	彼得於寂靜
持德者方便	不退於禪定	方便現亂心
見無諸忽務	方便智示現	亦無有恭敬

卷八

十四

無妄想戲論	非棄妄想界	方便智示現
不生亦不死	無生法豪貴	示現於生死
方便智勇健	出過魔境界	住威德佛界
而現魔境界	是佛子方便	到聖功德頂
方便凡夫行	淨智力衆生	方便智變化
一切法無際	知於本際空	不求於滅度
是方便所持	一切法無相	是達空無有
以化衆生故	示現相好身	是方便境界
大威德佛子	是佛子安住	示現百變化
諸善男子汝今當知如來方便出生十二功		

德成就精練佛土成於無上正真道已示現
劫濁時濁衆生濁煩惱濁命濁現差別乘示
現佛土汙穢不淨現衆生鈍現說法異現衆
生異現異道諍訟現魔魔業都無過咎當知
一切是如來方便佛說是已爾時文殊師利
童子白佛言世尊願說十二功德成就精練
佛土諸佛世尊於是功德精練佛土成於無
上正真之道佛言文殊師利是精練佛土有
精練劫成就具足不捨精練諸功德故諸佛
世尊即於是處成於無上正真之道是精練

佛土有精練時成就具足不違失於行法時故是精練佛土有於精練衆生成就無不知法故是精練佛土有於精練福田成就善妙淨故是精練佛土有於精練易解衆生成就具足不頑鈍故是精練佛土有精練乘成就具足出一乘故是精練佛土有於精練妙地成就無有物故是精練佛土有於精練妙地成就一切不外行道法故是精練佛土有於精練功德成就無諛諂故是精練佛土有精練心畢竟成就是白淨性衆生住故是精練

佛土有於精練聖人成就福田不空故是精練佛土有於精練道場成就往古先佛所住處故文殊師利是名十二功德成就精練佛土是處一切諸佛如來成於無上正真之道文殊師利汝今當知我此都無聲聞緣覺所安止處何以故如來捨離諸異相故文殊師利若其如來或有欲於衆生大乘或有欲於衆生小乘則是如來有不淨心有不等心有執著過有小分大悲有異想咎我便有於恪惜法咎文殊師利我若爲衆生有所說法皆

趣菩提皆趣大乘入一切智得到一切智以
是義故無異乘所止住處文殊師利白佛言
世尊若其無有異乘住處何故如來序說三
乘爲衆生說法此是聲聞乘此是緣覺乘此
是大乘佛言文殊師利乘止住處如來爲作
安止地耳非乘止處非法相作安止住處如
來爲人作安止處若少莊嚴無量莊嚴彼安
止處是乘無差法界無別故文殊師利如來
演說無障礙門次第到於所住止處文殊師
利猶工初學從善巧師到巧智岸種種方便

隨於弟子所欲學事令其巧知示現種種精
勤之事是巧智一也文殊師利如來世尊亦
復如是善法巧師是一切智作三種說文殊
師利猶如少火漸漸增長能燒至劫文殊師
利是一切智明亦復如是漸次增長乃至得
到如來大智智慧之明燒於一切衆生結使
文殊師利須彌山王無所分別若有衆生往
到其所一切同色謂一金色文殊師利是無
上如來大智須彌亦復如是無所分別若有
觀於如來法性皆同一色謂一切智文殊師

利喻如紺青大摩尼寶在在處處是摩尼寶
境界之內有異色光謂種種色種種異形是
摩尼寶威德力故皆爲一色所謂青色文殊
師利如來無上紺摩尼寶亦復如是若有衆
生觸如來光一切一色一切智色文殊師利
喻如大海雖種種門衆水流入入已一味所
謂鹹味以常住故文殊師利大海者謂如來
大智種種水入謂諸一切聲聞緣覺菩薩法
也入已一味所謂一乘無差別故文殊師利
以是方便當知如來安虛妄地如來分別引

導說作安止入如來法安住處故如來示現
次第入於佛法中故今小莊嚴大莊嚴者安
住佛法如來以是方便智辯種種變化說於
出世是第一義者一乘無二文殊師利此佛
刹土若諸外道有出家行如來是中現方便
行如來護持自在引導何以故文殊師利如
來善能降伏一切諸怨敵故如來一切常無
怨敵

菩薩行方便境界神通變化經卷上

菩薩行方便境界神通變化經卷中 養九

劉宋天竺三藏求那跋陀羅譯

文殊師利如轉輪王小功德成有盡德聚有貪有瞋有癡有取有結有使是轉輪王一切無有作怨敵者所以者何文殊師利是轉輪王無有諍惱文殊師利養九豈況如來轉大法輪無量大智功德莊嚴具足成就得無斷大悲旋行無漏法達空平等七助菩提法寶成就以不忘法轉大法輪外有諍訟諸怨敵怖無有是處文殊師利當知若見此佛刹土外道

出家汝善男子當知一切安住一道所謂佛道文殊師利喻諸禽獸無力能住師子王前如是文殊師利諸外道出家無能侵擾如來境界亦不能與如來競論大人師子持於十力得四無畏在其前吼無有是處惟除如來之所加持文殊師利喻日宮出放光明網一切螢火皆悉隱蔽一切珍寶火光星宿悉無照明如是文殊師利無上如來大日宮出時放大智光明諸外道出家皆悉隱蔽無有照明文殊師利喻勝鐵王隨其地分所出之處

一切諸鐵無有住者以諸鐵聚不共相故如是文殊師利若有佛土有佛出世當知一切諸外道等無出家行何以故不共相佛出於世故文殊師利喻如意寶王隨所出處不生一切偽摩尼寶如是文殊師利如來大智寶所出處當知是處不出外道文殊師利喻如寶性有出閻浮檀金之處是處不出下賤銅等如是文殊師利若有世界有佛出世是處不出一切外道文殊師利當知方便隨佛出處不應出諸外道出家文殊師利汝今當知

如來受持不可思議方便境界以是緣故此佛刹土現諸一切外道出家所以者何一切外道上首皆是住於不可思議解脫從般若波羅蜜出遊戲方便亦不捨離念佛法僧教化衆生到於彼岸如來受持化衆生故說是法時八千天子依聲聞乘者聞說一乘發於卷九無上正真道心五百比丘得一乘燈三昧千二百菩薩得無生法忍普此三千大千世界六種震動天於空中雨天青黃赤白蓮華雨天末梅檀於佛之前百千天子住虛空中發

聲唱呼天衣空中而自迴轉諸天作樂說如是言本未曾聞是經出世世尊今此經典久行於閻浮提八百比丘尼脫優多羅僧以奉上佛爾時世尊欲重宣此義而說偈言

方便境界不思議 文殊師利當知我

我精練時覺菩提 我又示現如此時
時節過咎我所無 常恒有此妙法時
衆生聞我法過度 衆生過患我所無
精練劫殘功德物 精練福田淨無垢
我精練時得菩提 是故知我無有濁

我已從久多億劫 成就無量佛智慧
如我得道命亦爾 於是中間無滅度
我方便現示滅度 有常想故示無常
我今示現於餘殘 我壽命等未來劫
我惟一乘一滅度 我差別乘不可得
作如是三說三乘卷九 當知方便之境界
有懈怠心及小心 聞即生於驚怖畏
爲是等故示三乘 惟有一乘無有二
我隨欲於法者說 入於佛道法事故
以是一乘演說三 然於此乘無傷損

如巧智度到彼岸	以是智示現於世
世尊亦爾智勝法	以此一乘演說三
等心調御諸衆生	我都無有於異想
我意喜敬於下乘	我則有於慳恪各
紺瑠璃寶衆寶上	隨其所在住止處
一切皆同作一色	而是紺色無差別
調御智寶亦如是	一切佛土普放光
一切衆生作一色	菩提心色無差別
猶如小火之所燒	漸漸增長成大焰
聲聞智焰亦如是	斯亦放佛功德光

須彌山王歸向者	以威德故同一色
歸依十力亦如是	柔忍者得菩提色
喻如一切衆蜂口	採拾種種衆淨妙
一切衆物共和合	皆悉作於一蜜相
知世讚世亦如是	示現作於三乘已
一切白淨和合已	作菩提相無異相
轉輪人王無憂惱	無有餘方怨敵故
我以法界普告勅	云何當有外道界
猶如日宮初出時	隱蔽熒火諸星宿
智慧宮出亦如是	蔽諸外道無照明

隨有勝鐵所住處 一切餘鐵無能行
若有國土如來行 是處無有外道行
隨有金玉所出處 是處不出生餘銅
若有刹土證菩提 是處不雜外道眾
意珠偽珠不和雜 過去未來亦不雜
佛寶外道亦如是 卷九 一刹土中常不雜
禪定神通忍自在 一切智門此外道
慧方便行智慧者 示現種種諸變化
聞於方便境界已 爾時佛子甚歡喜
生於慶樂喜無量 散花供養於調御

此地六種大震動 空中妓樂而鼓作
億天虛空中合掌 讚言善哉調御說
說此偈時薩遮尼乾子與八十億諸尼乾俱
從南方次第遊行於諸國界向優禪尼大城
之所百千大眾圍繞莊嚴唱叫喚呼爾時旃
荼鉢樹提王遙見薩遮尼乾子來於是薩遮
生愛樂心生清淨心與諸大臣內宮眷屬國
土人民子息四兵大王威德大王神力百千
滿瓊以用莊嚴鼓百千妓樂擎幢旛寶蓋以
為莊嚴即出往迎薩遮尼乾爾時薩遮尼乾

子遙見旃荼鉢樹提王柔輒愛語善來大王
汝國界中無有怨敵相逼切也無有病患苦
惱熱也是國臣屬諸技卒惡不肖之人守邏
關稅是等不亂壞國土不大王汝國沙門諸
婆羅門安樂行不大王汝常安法治理國不

卷九

上

大王不應害於衆生獵張漁捕逼諸衆生何
以故大王當知一切衆生皆悉愛命是故大
王應受不殺不應偷奪於自國封應空知足
不應邪淫自足妻色終不妄語真實而言不
應兩舌有異言說不應惡口常柔輒語不應

綺語隨所念語於他財封勿生貪心大王應
當離於瞋恚以慈莊嚴於身口意大王不應
生於邪見行聖正見大王汝今不應放逸善
觀無常大王當知壽命短促速至他世大王
汝今應怖畏後世應信業報重說勝偈

人主常應不放逸 護持境土不放逸
若放逸者墮惡道 若不放逸生善道
亦莫枉斷衆生命 一切衆生愛壽命
慧者不應害衆生 愛護衆生如己身
常應遠離於偷盜 常不應說於妄語

常應護持實言誓 大王當來生善趣
所說言語耳樂聞 不應說強麤惡語
常應愛語柔軟語 大王不應說兩舌
人主不應說綺語 有所言說隨順說
離於瞋恚過患惡 如大象王生善道
王不應行於邪姪 於他妻女離欲心
於自妻色常知足 汝當來生於善道
大王不應懷於見 當安住於妙善見
當修行於如是法 大王受天娛樂樂
持戒沙門婆羅門 及孝順供於父母

得遠離於惡道已 當受天中歡喜樂
是薩遮尼乾子以此不放逸法勸鉢樹提王
已爾時旃荼鉢樹提王向薩遮尼乾子說於
愛輒安樂之語自言不作如是之事汝婆羅
門可至我家何以故我今請汝及諸眷屬欲
設飯食尼乾子言善哉善哉當如是作何以
故大王我來道遠飢乏所須大王如是如汝
所請爾時大王在薩遮尼乾子眷屬後行前
入王宮入已薩遮尼乾坐御座餘諸尼乾隨
次而坐爾時彼王善心恭敬手自料理薩遮

卷九

六

尼乾及其眷屬食充足已爾時此王如是思惟我今當少問是薩遮尼乾子於如來所有信敬不王思是已取小卑牀坐於薩遮尼乾子前作如是言婆羅門我欲少論若聽許者我當問汝汝爲我說薩遮尼乾語大王言隨汝所欲自恣而問我當善答悅可汝心王聞聽已問言婆羅門世界衆生中頗有衆生慧者明了無亂心智然有過耶薩遮答言實有大王王又問言婆羅門此是誰耶薩遮答言跋沙婆羅門是王又問言跋沙婆羅門有何

過耶薩遮答言跋沙婆羅門善瞻星曆善知節會善學唱說善知月蝕善知地動善知豐儉善知世俗善學瞻相然實邪姪愛他妻婦大王慧人不應行於邪姪何以故大王行邪姪者現世來世得大苦法乃至天人之所訶

責如說偈言

養九

七

貪欲他婦女 不護惡境界 不足自妻色 世所有訶責

王言婆羅門世衆生中復有衆生慧者明了無亂心智然有過耶薩遮答言實有大王王

言誰是薩遮答言此頗羅墮婆羅門是慧者
明了知時非時彼有過患王又問言有何過
耶答言大王此婆羅門多所睡眠大王慧者
不應多於睡眠何以故大王睡眠退失世出
世法若智若斷如說偈言

若多樂睡眠 懈怠所覆蔽 睡眠放逸覆
凡夫退諸利

王復問言婆羅門世衆生中復有衆生成就
如是諸法然有過耶薩遮答言實有大王王
言誰是答言大王黑王子是王又問言是黑

王子有何過耶答言大王多於嫉妬大王慧
者不應多於嫉妬何以故大王若得成就於
封邑行於嫉妬是人封邑不得堅牢空手而
死死已便墮於餓鬼界如說偈言

嫉妬覆蔽心 彼人成封邑 彼有空手死
墮在餓鬼界

王又問言復有衆生成就如是上功德法有
過患耶薩遮答言實有大王王言誰是答言
大王此吉軍王子是王又問言吉軍王子有
何過耶答言大王是吉軍王子甚喜殺生大

王慧者不應好喜殺生何以故殺生短壽當墮地獄餓鬼畜生如說偈言

人王殺生者 少力及短命 命終墮地獄 是故不害生

王又問言婆羅門復有衆生慧者明了無亂
心智有過患耶薩遮答言實有大王王言誰
是答言大王此即無畏王子是也王又問言
無畏王子有何過耶答言大王多悲愍他大
王慧者不應多悲愍他何以故大王多悲愍
他若自在者是國多賊難可降伏多有過患

如說偈言

多悲愍於他 若人自在者 不能降伏是 不能執矩已

王又問言頗衆生中復有衆生慧者慧讚有
過患耶薩遮答言實有大王王言誰是答言
大王此天力王子是慧者慧讚然實有過王
言婆羅門天力王子有何過耶答言大王天
力王子飲酒放逸大王慧者不應多飲酒也
何以故大王酒多失念障礙上義亦失於世
及出世義如說偈言

常作放逸一切王事酒放逸蔽退出世義

王又問言婆羅門復有衆生慧者慧讚有過
患耶薩遮答言實有大王王言誰是答言大
王此天熏王子是慧者慧讚然有過患王言
婆羅門天熏王子有何過患答言大王天熏
王子長思慮過大王慧者不應有長思慮何
以故大王長思慮者妨廢失利令重事起不
得寂靜是故大王大聰慧者不應長思如說
偈言

若有長思慮 事失不吉利 以是善莊嚴

妨廢發意事

王又問言薩遮復有衆生慧者慧讚有過患
耶薩遮答言實有大王王言誰是答言大王
此大軍王子是慧者慧讚然有過患王又問
言大軍王子有何過耶答言大王有大慳惡
覆蔽之過劫奪他財大王慧者不應有大慳
惡如說偈言
若人主有慳 得封不知足 是所聚集財
至他世憂愁

王又問言薩遮復有慧者慧讚然有過患薩

遮答言實有大王王言誰是答言大王波斯匿王慧者慧讚然有過患王言婆羅門波斯匿王有何過患答言大王波斯匿王有多食過大王夫有慧者不應多食何以故大王若有多食嬾怠身重所食難消如說偈言

人主多食嬾怠身重又損覺知顏狀不鮮王又問言婆羅門世界衆生中復有慧者慧讚然有過患薩遮答言實有大王王言誰是答言大王汝是世間慧者慧讚汝亦有過王言婆羅門我有何過答言大王汝多暴虐惡

性卒急麤獷無慈大王夫有慧者不應麤暴若慧者麤暴人不多附乃至父母亦不滿意況餘衆生大王若聰慧者不應麤暴大王有慧之人應深長思如說偈言

若有麤暴不長覺思必有訶責無人憑仗

長九

爾時拏茶鉢樹提王面聞自過瞋恚忿惱不適其意不能忍耐語薩遮尼乾子言汝應於是大衆之中訶責我耶以瞋恚故勅令斬殺爾時薩遮驚怖向王說如是言大王不應作是卒暴施我無畏聽我所白王言與汝無畏

汝欲何說大王我亦有過我王面前說王過惡言多暴虐惡性卒急麤獷無慈如實而說大王慧者不應於一切時說他實事大王慧者應當知時非時何以故大王如實說他多不適意人不親附無慧者訶如說偈言

如實說人王 凡夫者所毀 是以智慧者思量然後說

爾時此王歎言善說復重問論婆羅門世衆生中頗有衆生慧者明了無亂心智無過答耶薩遮答言實有大王王言誰是答言大王

此沙門瞿曇是釋王種釋種出家如我等所瞻彼無過咎其種貴故無有過咎生於轉輪王種性故無有過咎不生廝下種性中故無有過咎釋種生故無有過咎色貌威德極端嚴故無有過咎相好莊嚴故無有過咎以是卷九義故無有過咎是釋瞿曇若不出家當作於大轉輪王七寶成就所謂輪寶象寶馬寶摩尼寶女寶藏寶臣寶主寶千子具足勇健端正能壞他衆亦皆成就轉輪王相於四天下統領自在爲正法王兵仗不用正法治國

既出家已苦行六年日日食於一麻一米坐
菩提樹降伏魔衆既降伏已一念心慧如所
知如所得如所觸如所覺如所證一切覺知
無有衆生與等等者何況有勝是沙門瞿曇
無有等者是故無過何以故大王是沙門瞿
曇家種無等端正威德無與等者智慧威德
無與等者是故無過如說偈言

持於三十二相好 出生釋種人師子
是淨飯王之太子 世尊一切智無咎
薩遮尼乾子如是說已鉢樹提王言大婆羅

門汝今當說何等是如來三十二大丈夫相
婆羅門言我今當說王言何謂也大王是沙
門瞿曇善安跣立足下平滿輪輻圓足手足
柔軟指長臍纖手足網縵是沙門瞿曇足跟
臍平足骨鉤鎖是沙門瞿曇其踰鹿蹲是沙
門瞿曇其身端直是沙門瞿曇陰藏隱密是
沙門瞿曇其毛一一右旋是沙門瞿曇毛悉
上靡是沙門瞿曇其髮紺青是沙門瞿曇皮
膚金色極上細軟是沙門瞿曇七處圓滿是
沙門瞿曇身體臍滿是沙門瞿曇極好支節

是沙門瞿曇身不透迤是沙門瞿曇身極長
廣是沙門瞿曇周身團圓如尼拘陀樹是沙
門瞿曇身如師子王是沙門瞿曇具四十齒
是沙門瞿曇其齒密緻是沙門瞿曇牙齒齊
平是沙門瞿曇牙齒鮮白是沙門瞿曇得上
勝味是沙門瞿曇其舌廣長是沙門瞿曇有
梵音聲是沙門瞿曇胸則俱胸是沙門瞿曇
其目紺青是沙門瞿曇白毫相具是沙門瞿
曇其頂有髻大王是沙門瞿曇具三十二大
丈夫相以是義故無有過咎如說偈言

卷九

十二

出生釋種頂有髻 其髻紺青而右旋
目如青蓮牛王胸 是故世尊無過咎
迦陵頻伽梵音聲 其舌長廣淨鮮薄
人中世尊齒齊密 含齒四十而白淨
一切世人及諸天 瞻覩其笑皆歡喜
佛世尊舌徧覆面 是故衆生無與等
一切衆味悉和集 世尊舌相之所出
一切衆味作一味 是故世尊無過咎
如師子身頻婆脣 其肩端嚴圓滿好
世尊身如尼拘樹 周而團圓善安住

世尊莊嚴身端直 人師子身極長廣
七處旋滿無與等 上妙金色善鮮淨
人師子毛而上靡 其體皮膚極細軟
其髻各各合螺成 是故衆生無與等
又師子跔不曲垂 陰藏隱密如馬王
太九 脰臍圓滿鹿王躡 其誰瞻覩不歡喜
十三 世尊手足有網縵 其指纖長赤銅爪
足跟臍平鉤鎖骨 足下平滿無高下
世尊手足壯柔軟 纖長指普有輪相
人尊足安而平跔 履行地時不傾動

無與等者如是相 世燈如是善莊嚴
處在大衆甚尊妙 猶如月王處衆星
是大丈夫色如是 世尊爲世作燈明
何況其餘無漏法 以是法故自然覺
大王是沙門瞿曇真色尊妙一切衆生無與
等者以是義故無有過咎大王是沙門瞿曇
大慈力成於諸衆生其心無礙常行大慈無
礙著故自然普到一切世界入諸衆生大王
如摩尼寶能清濁水寶性淨故能令一切濁
水清淨大王沙門瞿曇亦復如是內清淨故

能淨一切衆生結使濁汙淤泥是故無過如說偈言

慈心普徧世 三世諸世界 一切衆生心
一切智普慈 無處不普至 是慈無與等
普覆虛空界 一切智無過 善淨摩尼寶

能淨於濁水 世尊淨諸有 淨衆生結垢
大王是沙門瞿曇成三十二大悲之行何等
三十二見世衆生沒愚癡闇是沙門瞿曇於
是衆生行於大悲見世衆生在大無明殼是
沙門瞿曇於是衆生行於大悲見世衆生墮

在於大生死輪迴是沙門瞿曇於是衆生行
於大悲見世衆生常勤行於不善寂法是沙
門瞿曇於是衆生行於大悲見世衆生墮於
大流順流而去是沙門瞿曇於是衆生而起
大悲見世衆生墮於大山大苦逼切是沙門
瞿曇於是衆生而起大悲見世衆生離於聖
道墮於邪道是沙門瞿曇於是衆生而起大
悲見世衆生閉大牢獄自然纏縛是沙門瞿
曇於是衆生而起大悲見世衆生貪於色聲
香味觸故無厭無滿是沙門瞿曇於是衆生

卷七

十四

而起大悲見世衆生是愛奴僕常繫屬他是沙門瞿曇於是衆生而起大悲見世衆生老死逼切羸劣困悴是沙門瞿曇於是衆生而起大悲見世衆生常病逼切是沙門瞿曇於是衆生而起大悲見世衆生爲三火燒常觸焦熾是沙門瞿曇於是衆生而起大悲見世衆生下纏所纏增長生死是沙門瞿曇於是衆生而起大悲見世衆生心常驚怖是沙門瞿曇於是衆生而起大悲見世衆生貪嗜少味不見過患是沙門瞿曇於是衆生而起大

悲見世衆生久眠放逸是沙門瞿曇於是衆生而起大悲見世衆生墮大飢餓常互相害是沙門瞿曇於是衆生而起大悲見世衆生常在衰損互相劫奪是沙門瞿曇於是衆生而起大悲見世衆生無明所盲常不明是沙門瞿曇於是衆生而起大悲見世衆生共相鬪諍惱亂不息是沙門瞿曇於是衆生而起大悲見世衆生如荏草茲其是沙門瞿曇於是衆生而起大悲見世衆生不淨交會離於清淨是沙門瞿曇於是衆生而起大悲見

卷九

十五

世衆生行於諸難離於無難是沙門瞿曇於是衆生而起大悲見世衆生多於疑惑著諸邪見是沙門瞿曇於是衆生而起大悲見世衆生如兜羅華依種種見是沙門瞿曇於是衆生而起大悲見世衆生想心見倒無常常想苦有樂想不淨淨想無我我想是沙門瞿曇於是衆生而起大悲見世衆生擔負重擔常受苦乏是沙門瞿曇於是衆生而起大悲見世衆生依止羸劣不堅牢想是沙門瞿曇於是衆生而起大悲見世衆生常在垢汙是

沙門瞿曇於是衆生而起大悲見世衆生繫縛欲有而心貪著是沙門瞿曇於是衆生而起大悲見世衆生利養覆蔽常求於利是沙門瞿曇於是衆生而起大悲見世衆生墮在種種病苦憂悲啼哭愁惱衆苦大聚是沙門瞿曇於是衆生而起大悲大王此沙門瞿曇成就如此三十二種大悲行故是故無過如說偈言

無明愚癡大闇黑 見無明蔽蔽衆生
見衆生趣生死獄 是故人尊生大悲

衆生常勤造衆行	正覺見衆生流漂
恒常隨順此流漂	十力常生大悲心
墜墮於極高大山	見衆生行於邪道
善安止於聖道中	安寂靜處無煩惱
諸邪見者所繫縛	愛怒境界無滿足
爲生老死之所死	是故十力有大悲
種種衆苦所逼切	見世三火燒熾然
驚怖畏之被鹿皮	以是緣故十力悲
衆生貪著嗜於味	放逸貪著於境界
見其墮於飢餓道	調御能救於怨害

見諸衆生互相害	爲無明闇所覆蔽
猶如荇草蔓茲其	以是緣故十力悲
姪欲所生諸繫縛	見諸衆生行難行
行於邪見稠林中	以是緣故十力悲
於不淨中有淨想	無常有常無我我
見諸衆生負重擔	是故十力生於悲
見擔負於大重擔	凡夫常依止羸劣
常爲諸結所汙染	是故十力有大悲
見爲利養所覆蔽	復次境界無厭足
墮於欲有之大海	是故十力有大悲

多於種種憂愁病 見諸衆生苦惱已
爲是一切諸苦惱 是故十方有大悲
知於非有亦非無 彼常有於大悲心
一切衆生普徧心 是故一切智無過

大王今復略說是沙門瞿曇成就四念處四

卷九

十七

正勤四如意足四禪五根五力七助道法八
聖道分成就具足是故大王是沙門瞿曇無
有過咎如說偈言

常勤精進修念處 大覺善知於正勤
大仙禪定得自在 勝出衆生無過咎

調御世成諸神通 諸辯自在到彼岸
如來善知解脫呪 大覺善通達諸諦
於梵行處得自在 修於慈悲及喜捨
善安止住於定慧 是故常無衆過咎
大仙善知助菩提 如來善知八聖道
濟衆生苦於聖道 究竟安止安樂渚
一切世界無衆生 有與世調齊等者
一切智成一切德 恒常不毀咎於他
大王是沙門瞿曇成就十力王言太婆羅門
何等是名如來十力大王是佛如來是處如

實知是處非處如實知非處去來現在作業
受業住處因報如實而知無量諸界種種世
界如實知之若諸餘人餘衆生等種種所解
如實而知若餘衆生餘人等根勝非勝根如
實而知一切至道如實而知若餘衆生餘人
諸根諸力助道諸禪解脫定次第定一切結
使汙染白淨隨各各處如實了知念於無量
種種宿命若於一生若無量生如其所行如
其所說如實而知天眼清淨過於肉眼見諸
衆生種種生死乃至生於善道惡道如實而

知知諸漏盡無漏心解脫及慧解脫如實而
知大王是名如來十力成就具足力故名持
十力名無降伏是故無過而說偈言
是處非處如實而知實說大人彼無有過
過去無障彼有智慧未來現在知不失之
善知業報知有因緣如實不錯世調御知
知於無量種種諸界善知諸界世人無等
世種種解無量諸解照世明知如實不異
知於鈍根亦知中根又知熟根到根彼岸
一切至道如實而知根力助道神通解脫

汙染白淨各各了知無有障礙知見無礙
念於平等無量稱實自身及他如實無異
天眼清淨過於人眼生死衆生調御悉見
知諸漏盡亦知解脫無漏有異亦悉知見
是人尊力覺了自在是一心有無分別
動發非發自然而有如初轉輪無分別行
一心而知諸衆生思及衆生心無有二相
是故無過佛得自在一切善法出諸德事
大王是沙門瞿曇成四無畏王又問言大婆
羅門何等如來四無畏也大王是沙門瞿曇

自言我得於正徧知若有沙門諸婆羅門魔
梵及世言汝於諸法不正徧知我不見是相
不見相故得安隱行得無畏行自言我得最
勝處行在大衆中正師子吼能轉梵輪沙門
婆羅門及餘諸世無有能轉是正法者佛自
誓言我諸漏盡若有說言汝漏未盡佛不見
是相不見相故如來得於安樂之行得無畏
行得勝處行在大衆中正師子吼能轉梵輪
沙門婆羅門及餘諸世無有能轉是正法輪
佛說障道法若有說言親近是法無有障礙

長九

十九

佛不見是相不見相故得安樂行得無畏行
得勝處行在大衆中正師子吼轉於梵輪沙
門婆羅門及餘諸世無有能轉是正法輪我
說聖出道若有說言親近是者不能出世佛
不見是相不見相故得安樂行得無畏行得
勝處行在大衆中正師子吼能轉梵輪沙門
婆羅門及餘諸世無有能轉是正法輪大王
此是如來四無所畏如來成就是四無畏在
大衆中正師子吼是故無過如說偈言
衆中師子吼 人調無所畏 更無與我等

況衆生有過 若我所覺法 是真實不虛
是正徧知見 鹿王師子吼 若有違逆者
不見有彼相 以不見相故 人調無所畏
我一切漏盡 我身是無漏 無有似等者
諸天及世人 有是障礙法 世調御所說
是真實空虛 無有可變異 我說出道法
自覺已演說 修行此法者 無有於障礙
大健知是已 如來得安樂 得於無畏樂
勝大丈夫行 轉於梵法輪 餘無有能轉
世間所不轉 唯除兩足尊

菩薩行方便境界神通變化經卷中

音釋

養九

二十

珣下江切 瓠頸也 臍丑凶切 逶迤逶迤切 網綆網切 捕擒捉切 蝕侵力切 獮古切 蹲惡切
眴目舒切 腓腸也 市究切 逶迤逶迤切 網綆網切 捕擒捉切 蝕侵力切 獮古切 蹲惡切
眴目舒切 腓腸也 市究切 逶迤逶迤切 網綆網切 捕擒捉切 蝕侵力切 獮古切 蹲惡切
眴目舒切 腓腸也 市究切 逶迤逶迤切 網綆網切 捕擒捉切 蝕侵力切 獮古切 蹲惡切
眴目舒切 腓腸也 市究切 逶迤逶迤切 網綆網切 捕擒捉切 蝕侵力切 獮古切 蹲惡切
眴目舒切 腓腸也 市究切 逶迤逶迤切 網綆網切 捕擒捉切 蝕侵力切 獮古切 蹲惡切
眴目舒切 腓腸也 市究切 逶迤逶迤切 網綆網切 捕擒捉切 蝕侵力切 獮古切 蹲惡切
眴目舒切 腓腸也 市究切 逶迤逶迤切 網綆網切 捕擒捉切 蝕侵力切 獮古切 蹲惡切
眴目舒切 腓腸也 市究切 逶迤逶迤切 網綆網切 捕擒捉切 蝕侵力切 獮古切 蹲惡切
眴目舒切 腓腸也 市究切 逶迤逶迤切 網綆網切 捕擒捉切 蝕侵力切 獮古切 蹲惡切

或方切
草也

永樂北藏

方便神通變化經

第四一冊

永樂北藏

方便神通變化經

第四一冊

菩薩行方便境界神通變化經卷下 養十

劉宋天竺三藏求那跋陀羅譯

復次大王是沙門瞿曇成就十八不共佛法
大王何等十八不共佛法大王是佛如來無
有錯亂口無言說無有失念無有異想無不
定心無不知已捨欲無退減進無退減念無
退減慧無退減解脫無退減解脫知見亦無
退減一切身業以智爲首隨於智行一切口
業一切意業以智爲首隨於智行知於過去
無礙知見知於未來無礙知見知於現在無

礙知見大王是名如來十八不共佛法成就
是故無過如說偈言

世尊無錯亂	口無有言說	其念無有失
是故彼無過	無有於異想	正智心不亂
隨時不生捨	一切智無過	欲無有退減
善逝進無減	其念無有失	彼無能毀者
慧無損退減	解無有退減	解知見無減
彼智無有惱	一切諸身業	口業及意業
以智力自在	智亦無有失	知於過去世
彼智無有礙	未來亦無礙	現在世無礙

有如是功德 是沙門瞿曇 復過是無量
非我說能盡

爾時栴荼鉢樹提王聞如來如是不可思議
諸功德已甚適其意歡喜踊躍生於愛樂於
是薩遮尼乾子所得無量歡喜得不可思議
想得世尊想得善知識想得示菩提想得度
到彼一切智想得啓請想得於念想又得菩
薩不可思議解脫之想得於如是諸想心已
以價直百千真珠瓔珞又復以上無價之衣
供養薩遮尼乾子已如是讚言善哉善哉薩

遮尼乾子善說汝第方便之法又言薩遮汝
所說法順一切智汝所說法到一切智汝所
說法出於生死汝所說法滅結使垢汝所說
法破嫉妬門汝所說法擊大施鼓汝所說法
能破壞魔大憍慢山汝所說法能乾愛海汝
所說法照愚癡林汝所說法教化衆生不過
失時王說是已薩遮尼乾子語大王言如
是大王菩薩威儀無不調伏諸衆生者無有
說法違逆大乘若不能增益一切智若不能
盡一切結使若不能示生死過患若其不能到

於涅槃若不能近菩薩之行若不能到自利利他及俱利者無有是處大王若有一切初發意時便到自利利他俱利薩遮尼乾說是事時旃荼鉢樹提王得斷疑已得不壞信十六王子得於歡喜信行之界八千天子獲得三昧名莊嚴佛行是王宮中所坐尼乾有萬三千發於無上正真道心各各脫衣供養薩遮尼乾子已作如是言我等今者得於善利見是薩遮大善男子又聞演說是隨順法復言薩遮可與俱往欲見世尊是佛如來今在

我園薩遮答言一切悉來和合共往爾時大王與其眷屬大臣人民設大莊嚴爾時大王徧城行令唱如是言若不至於如來所者當斬殺之舉城一切男子女人童男童女聞王令已各各持諸華香華鬘塗香末香種種妓樂出於優禪大城外已向園而住待於大王爾時鉢樹提王與薩遮尼乾子諸大臣等王子兵衆內宮嫔女國土人民騎乘園遶大王威德王大神力王大變化王大遊戲擎幢旛蓋百千音樂歌舞唱妓簫笛擊節出種種妙

卷十

三

音象馬槃戲百千吉琬在前行列以金鎖莊
校象車馬車九十八億人衆圍繞趣向自園
詣世尊所到已頂禮佛足右繞三匝却住一
面薩遮尼乾及其眷屬頂禮佛足各繞無量
百千匝已住立合掌觀佛不瞬爾時大德舍
利弗見薩遮尼乾子佛前觀佛目不暫瞬見
是事已作是思惟薩遮尼乾子何緣來此如
是思已語薩遮尼乾子言薩遮汝何緣故詣
如來所欲見如來爲欲聽法薩遮尼乾子言
大德舍利弗我不見佛不爲聽法大德舍利

弗我今不用一切法故詣如來所何以故大
德舍利弗見色不名見於如來見受想行識
亦不名爲見於如來不見地大水火風大名
見如來不見於我名見如來不見衆生不見
壽命不見養育名見如來不見丈夫名見如
來不見我勝我所勝名見如來不見於相名
見如來大德舍利弗不見一切相者名見如
來不見執著名見如來見無有物名見如來
見於性故名見如來見於本際名見如來見
眼色離欲名見如來見耳聲無教名見如來

見鼻香不和合名見如來見舌味無知名見
如來見身觸無著名見如來見意法無分別
名見如來舍利弗言薩遮以如是相見如來
者云何見如來耶薩遮答言大德舍利弗非
以種故見於如來不以性故見於如來非相
非無相非法非無法非實非不實非境界非
不境界非思惟非不思惟非分別非不分別
非有爲非無爲非物非不物非聚非散非色
非受非想非行非識非取非不取名見如來
舍利弗言薩遮以如是相見如來者汝善丈

卷十

四

夫云何得見於如來耶薩遮答言大德舍利
弗我非到色見於如來亦不離色見於如來
亦不壞色見於如來如是受想行識非到於
識見於如來不離於識見於如來亦不壞識
見於如來非現世分見於如來非過世分見
於如來非以陰分見於如來非以界分見於
如來我以如是見於如來我見一切言說非
言說名見如來我非見非不見非有非不有
非分別非不分別非憶想非諍非惱非起非
取非捨非戲論非作想非不作想非作物非

不作物非動發非不動發非作見非無作見
非境界見非不境界見非言語非不言語見
於如來離於一切所有言語談論音聲名見
如來亦無所見大德舍利弗菩薩如是見於
如來我亦如是見於如來舍利弗言汝以如
是見於如來汝復云何聞說法耶薩遮答言
大德舍利弗若我聽於如來說法若生法想
非是法想何以故大德舍利弗菩薩一切所
有言說皆出於法然不執著亦不生想何以
故離法想故舍利弗言汝今薩遮不求聽法

詣如來耶薩遮答言大德舍利弗我非求法
非不求法詣如來耶何以故大德舍利弗夫
求法者名不求於一切諸法大德舍利弗夫
求法者不著佛求不著法求不著僧求不知
苦求非斷集求非修道求非證滅求非過欲
界非過色界無色界求非生死求非涅槃求
大德舍利弗汝當知我都不求於一切法故
詣如來所舍利弗言以何因緣故作如是說
薩遮答言大德舍利弗一切諸法無因緣故
我如是說又法界性無有因緣非無因緣俱

不可得故舍利弗言汝今流轉於諸道耶薩遮答言大德舍利弗若有道者我則流轉若有生者我則有生若有去者我則有死大德舍利弗一切諸法無去無生死舍利弗言薩遮如佛所說汝等比丘生老病死薩遮答言大德舍利弗一切衆生依止有道及憍慢故爲壞依止如來世尊作如是說佛法如性無有如是生老病死舍利弗言善哉善哉薩遮汝說大乘知分別義薩遮答言大德舍利弗汝今能知云何是義云何分別舍利弗言善

男子我非說者我今欲聽善男子汝當演說云何是義云何分別薩遮答言大德舍利弗義者謂無言說若有言說名爲分別又復義者謂不可說若有言說名爲分別又復義者謂默然若有言說名爲分別又復義者謂無動搖無諸戲論卷十無有分別無有莊嚴非有非物無有我想非勇不可取不可見無有居止離於一切居止言說又分別者謂思量數觀往至他心又復義者名謂義辯分別者謂法辯辭辯樂說之辯大德舍利弗是名略說

義及分別爾時世尊讚薩遮尼乾子善哉善哉善男子如汝所說此法時三千天子得無生法忍二萬衆生聞此大辯發於無上正真道心爾時大德目連白佛言世尊是薩遮善男子作是外道尼乾子服化幾衆生佛告目連若聞此事一切天人皆當迷惑惟除菩薩摩訶薩等目連諦聽我今演說薩遮尼乾子種種形服色像威儀教化衆生少分之事目連是薩遮善男子作外道服教化須彌塵數衆生令發無上正真道心作遮勒形服化

四天下塵數衆生發於無上正真道心作餘異道出家之像化八十四恒河沙等衆生發於無上正真道心現聲聞形化十恒河沙等衆生示聲聞乘已然後復化令發無上正真道心作緣覺像教化衆生復過是數菩薩形服教化衆生復過是數復作釋像復作梵像復作轉輪大王之像復作護世像復作緊那羅像復作阿脩羅像復作迦樓羅像復作摩睺羅像復作人像復作非人像復作男子像復作女人像復作童子像復作童女像復作

卷十

七

地天像復作即化生天像復作仙人像復作
年少婆羅門像復作比丘像復作比丘尼像
復作優婆塞像復作優婆塞像目連薩遮善
男子教化衆生如是甚多爾時目連白佛言
世尊是薩遮尼乾子奉事供養幾如來耶佛
告目連假量虛空可得其邊無有能得薩遮
善男子以種種形供養奉事諸佛如來得其
邊者目連假令能得地界水界火界風界衆
生界邊無有能得是薩遮善男子奉事供養
諸佛如來得其邊者爾時大德大迦葉語薩

遮善男子言善男子汝多奉事供養諸佛汝
之功德具足成就何故不成無上正道薩遮
答言大德迦葉若有菩提有覺菩提者我當
覺於無上正道大德迦葉語薩遮言恒河沙
等菩薩摩訶薩發菩提願覺於無上正真之
道已覺今覺當覺薩遮答言大德迦葉爲憍
慢衆生作如是數第一義中無有菩提無覺
菩提者何以故大德迦葉菩提是無爲離一
切數菩提非色不可見故菩提非青非黃非
赤非白非紫非玻璃色無有形像無貌無相

過一切相無有居止斷一切居止非有離一切有非相離一切相無有言說口業不及故非見非聞亦非有物非暗非明無形無體不可言說非不可說非觸非知非聞非聲非句非繫非縛非解非染非瞋非癡非一切事非假名非不假名大德迦葉菩提性爾又菩提者非身所覺又菩提者非心所覺何以故大德迦葉身癡無智猶如草木牆壁土塊是故不能覺於菩提心者非色又不可見是亦不能覺於菩提亦無衆生可覺菩提大德迦葉

一切法性皆悉如是汝云何言汝何不成無上正道爾時菩薩大聲聞衆優婆塞優婆塞及釋梵護世如是思惟世尊如實知衆生心如所解知如來當斷我等疑惑猶豫之心當說薩遮善男子記幾時當成無上正道世界何名得菩提己名號何等住壽幾何大衆有幾爾時世尊知菩薩聲聞優婆塞優婆塞釋梵護世心之所念即告文殊師利是薩遮善男子此賢劫過已然後復過於算數劫當得作佛號實意相王如來應供正徧知其佛世

界名善觀稱劫名滅刺文殊師利是善觀稱
世界端嚴甚可愛樂七寶莊嚴周匝百千七
寶垣牆以為莊嚴有百千漸七種香水充滿
其中復有百千高大臺觀七種瑠璃大寶所
成有百千萬閻浮檀金網以為莊嚴而徧覆
之有百千萬摩尼之寶間錯臺觀有百千萬
過師子摩尼寶莊嚴牖嚮有百千萬師子幢
摩尼寶莊嚴寶座有百千萬大幢摩尼寶照
明一切百千萬鈴網出於和適輒妙音聲徧
滿其中懸百千萬珍寶金幡豎立百千萬種

相幢文殊師利是善觀稱世界地平如掌寶
樹徧覆生柔軟草其草右旋如難提跋旦孔
雀項色猶如天衣是草普徧善觀稱界有百
千萬園以為莊嚴其一園復以百千萬園
圍繞莊嚴有百千萬池周徧莊嚴是一池
以八楞摩尼寶而間錯之閻浮檀金以為梯
墜底布金沙滿八味水寶華徧布有鵝鴈鴛
鴦相和而鳴文殊師利善觀稱世界百千萬
國及城邑村落周徧莊嚴其一大城復有
百千萬城周匝莊嚴諸村邑聚落亦復如是

永樂北藏

方便神通變化經

第四一冊

是一切國城邑村落男女充滿文殊師利是
善觀稱世界之中有四天下名適意見甚爲
殊特極妙端嚴極盛豐樂男女甚多彼實意
相王如來應供正徧知當生其中文殊師利
是實意相王如來出婆羅門種母名勇猛如
今我母名曰摩耶父名梵摩婆秀如我父王
名曰淨飯彼當有子名曰徧聲如今我子名
羅睺羅有妻勝后名曰大意如今我妻瞿婆
伽釋種童女當有乳母名曰大稱如我乳母
名摩訶波闍波提瞿曇彌彼佛世尊當有待

使名常順行如我侍使名曰闍陀彼佛如來
有六馬王名曰大力實意相王當乘出家如
今我馬王名建特迦彼佛如來當有道場名
曰法勇彼佛如來於道場上當成無上正真
之道當有八十億菩提樹周徧莊嚴文殊師
利彼佛爾時無魔無魔天衆文殊師利彼當
來世實意相王成於無上正真道時彼佛世
界所有衆生悉以一切諸華香鬘種種妓樂
作衆妓樂當共往詣法勇道場上至阿迦貳
吒天衆一切來集龍衆夜叉衆乾闥婆衆阿

脩羅衆迦樓羅衆緊那羅衆摩睺羅伽衆皆當來集東西南北諸大菩薩皆當來集文殊師利是實意相王初覺菩提已在大衆中說此菩薩行方便境界神通變化經無量百千億經而圍繞之文殊師利彼實意相王如來說此經時恒河沙等衆生於阿耨多羅三藐三菩提得不退轉文殊師利是實意相王如來不說於三乘法彼佛世界無聲聞緣覺惟皆一乘妙解衆生生彼世界文殊師利彼實意相王如來世尊初會說法當有恒河沙等

菩薩得不退轉第二大會有八十那由他菩薩當得一生第三大會當有六十頻婆羅數菩薩自是已後當有過於算數菩薩安住不退無上正真道文殊師利彼實意相王佛得成道已壽六十中劫佛涅槃後正法住世八十億百千那由他歲當廣流布佛之舍利所謂衆生其數如先文殊師利彼佛臨欲入滅度時授於大相菩薩記已後乃滅度此大相菩薩次於我後當得成於無上正真道號大莊嚴如來應供正徧知時此大衆心生驚疑

卷十

十

誰是爾時大相菩薩次彼世尊當成無上正真之道號大莊嚴如來應供正徧知爾時世尊知大眾心即告文殊師利童子是薩遮善男子前坐外道小童子者名實歡喜得勝一切諸餘童子彼當成佛號大莊嚴如來應供正徧知彼佛世界所莊嚴事如彼實意相王如來等無有異此衆聞彼佛刹功德莊嚴威德會中六十億百千那由他諸菩薩等發心願生彼佛世界白佛言世尊是實意相王得成佛時我等當生彼佛世界世尊即記當生

彼國有八十億諸尼乾等同聲唱言世尊我等亦當生彼佛土佛一切記當生彼國於上空中有九十億百千那由他諸天子等說如是言世尊彼實意相王佛得菩提時我等當生彼善觀稱世界之中當見如是功德莊嚴佛即記言汝等天子亦當生彼善觀稱界奉事彼佛汝諸天子亦當於彼善觀稱界成於無上正真之道各有異名等同壽命即時三千大千世界六種震動其地自然湧出無量百千億那由他大寶蓮華閻浮檀金為葉大

紺瑠璃摩尼爲臺碑礫爲鬚瑠璃爲莖諸蓮
 華中有菩薩現結跏趺坐相好嚴身恭敬禮
 佛以於種種瓔珞雲網供佛世尊皆言我等
 各各在於異佛世界遙聞說此不可思議菩
 薩功德經故來至此見佛世尊禮敬右繞亦
 爲見薩遮善男子及諸大衆又言世尊有不
 思議諸佛刹土無數衆生聞此經已皆得
 不退無上正道爾時世尊欲重宣此義而說
 偈言
 聽我說此義 一心勿亂念 如來語無虛

調御無異說	薩遮佛出世	過算數億劫
號實意相王	劫淨無垢刹	無有姪欲刺
無有多過咎	亦無愚癡刺	彼劫無瞋刺
世界善觀稱	雜妙色莊嚴	人天喜樂觀
調御世當有	遊寶高臺觀	當有普嚴淨
間浮金網覆	妙輦聲適意	豎師子寶幢
懸珍寶金幡	珍寶高牆壁	當有天宮德
當有江生成	當一切莊嚴	青白蓮徧布
八味水盈滿	當中四天下	名曰適意見
善逝所池井	出婆羅門種	母名曰勇猛

父梵摩婆秀	子曰徧名聲	如我子羅睺
彼善逝勝后	其名曰大意	如我后瞿婆
乳母名大稱	如今我乳母	名曰瞿曇彌
侍使名順行	當爲調御使	供給於善逝
如我使闍陀	二足尊馬王	當名曰大力
負善逝出家	如我建特迦	彼如來道場
當名曰法勇	八十億百千	樹周帀圍繞
人尊坐此已	實意自無等	無上無憂道
道樹下善覺	無魔無魔衆	終無有魔業
善逝士無刺	有無等丈夫	彼界有衆生

作人天功德	華鬘諸妓樂	出詣世尊所
調御知衆集	知畢竟心淨	當說此經王
有億經圍繞	聞於此勝經	二足尊說時
多億恒沙衆	有不退佛智	終不聞下乘
亦無緣覺乘	慧健諸菩薩	彼佛世界有
二足尊初會	當有恒河沙	功德海不退
菩薩大名稱		
二會八十那由他	悉皆得住於一生	
三會六十頻婆羅	諸善菩薩多利益	
滿六十中劫	善逝所壽命	人調御滅已

正法廣流布	八十億千歲	法住那由他
舍利廣流布	亦多調衆生	世調滅度時
記大相菩薩	汝當調御世	號名大莊嚴
彼莊嚴亦爾	利衆生亦等	當作調世覺
無上無塵道	我知見無上	知當無量劫
何況現在前	一切智無礙	信我語無量
如來語無空	諦住於我教	取我所說語
聞善逝說已	大衆生喜勇	發願彼世界
我等當生彼	世調御說記	生彼無垢刹
汝當覺勝道	廣利來衆生	說此經王時

大地六種動 華中出菩薩 合掌禮調御
善哉覺丈夫 善說法不斷 佛說法我聞
遠來此爲法

當于爾時一切大衆甚適其意歡喜踊躍愛
樂受持惟留一衣餘衣悉以奉上供佛說如
是言世尊出世再轉法輪於波羅柰初轉法
輪今復更轉最大法輪咸言世尊願令我等
常不離於如此法寶亦常不離此善丈夫時
上空中作種種天樂兩大青黃赤白蓮華於
佛之前諸天天衣於虛空中而自迴轉唱如

是言是善丈夫於當來世成就不可思議功德所謂若有受持此經讀誦通利爲他廣說說是語已文殊師利白佛言世尊是善男子善女人等書寫此經受持讀誦令通利已爲他廣說得幾所功德如是問已佛言文殊師利若有一善男子善女人三千大千世界之中所有衆生有色無色有想無想有衆生界惟佛能知諸有一切未得人身悉得人身成於無上正真道已是一善男子善女人恭敬供養尊重禮拜是一切佛施諸所安壽命一

劫文殊師利於汝意云何是善男子善女人以是因緣得福多不文殊師利答言甚多世尊甚多善逝無有能數無有計量佛言文殊師利是善男子善女人書寫受持讀誦通利爲他廣說福多於彼善男子善女人供諸佛者文殊師利言世尊未曾有也世尊利益一切世間說此經典世尊此經當於閻浮提中流布幾時佛言文殊師利我涅槃後我之舍利當廣流布爾時八王當以寶箱分我舍利作八分已各各自國造作大塔阿闍世王取

卷十

十五

我舍利第八之分盛寶香奩王舍城外穿鑿於地而藏隱之安置種種衆妙雜香堅立種種幢旛寶蓋散寶華然持百歲燈藏舍利箱待阿叔迦王於金葉上書此經王并藏去之文殊師利我涅槃後百歲當有阿叔迦王是王當出於暮刹利種王閻浮提得自在住四渚轉輪彼王爾時修念我行於佛法中得清淨心爾時有比丘名因陀舍摩得大神通有大威德攝持正法持方等經是王種出家出入阿叔迦大王宮中文殊師利阿叔迦王爲

廣流布我舍利故大多將從諸貴人等大王威德而自莊嚴持諸華鬘末香塗香種種妓樂到王舍城大設供養懇掘其地取舍利箱七日之中設種種供養以一切華一切鬘一切末香一切塗香一切妓樂作如是大供養已然後隨於種種多人所居止處一日一時安起八萬四千大塔爾時因陀舍摩法師從於寶箱出此經已安置北方多人住處此經又無多人識知無多人解無多人受少人受持讀誦此經文殊師利此經多隱在箱篋中

何以故無人受故非其器故文殊師利當知此經難解難信難得其底非是常人所信受非凡下人能讀能入文殊師利後五十歲時若復有人聞此經典信解恭敬文殊師利不應作疑當知是人供養多佛善行於此大乘經典有真實器若有書寫受持此經讀誦通利是衆生等應當自知我等已見恒河沙等諸佛如來奉事供養右繞禮拜亦見於我在此園中說是經時及見大衆爾時佛告阿難汝受此經讀誦通利汝慎勿於廝下人前

說此經典不知根故何以故阿難是如來功德是如來密處是如來說純無雜法是如來印是如來堅法是如來勝財阿難汝當堅持勿妄與人惟除我長子持我法藏護我法藏與是等人阿難白言我持此經已世尊此經何名云何受持佛言阿難此經名曰說菩薩行方便境界神通變化經亦名如來密處亦名如來說純無雜法亦名如來說出一乘亦名文殊師利所問亦名薩遮受記亦名薩遮品如是受持如來演說此經法時有三十那

由他諸衆生等本未曾發無上道心今悉發
 心也六萬菩薩得無生法忍無量衆生畢定
 無上正真之道佛說是經已大德阿難歡喜
 適意文殊師利童子一切菩薩比丘比丘尼
 優婆塞優婆斯釋梵護世天及世人聞佛說
 已歡喜信受

卷十

十七

菩薩行方便境界神通變化經卷下

永樂北藏

方便神通變化經

音釋

漸七乾切速速牖牖鄉許亮切久久切切壁壁窓窓也也爲爲梯
 登梯都都鄧鄧切切雞雞也也木木階階也也隆隆也也奩奩力力鹽鹽切切鑿鑿在在各
 也也塋塋掘掘其其月月切切穿穿也也箱箱篋篋箱箱息息良良切切廝
 也也息息也也切切

第四一冊